

REZIMEI PROJEKATA PODRŽANIH KROZ JAVNI POZIV organizacijama civilnog društva iz Bosne i Hercegovine

1. Udruženje žena „Napravi razliku“ - "Građansko povjerenje u Udruženja žena u BiH: Transparentnost i Odgovornost"

Udruženje žena "Napravi Razliku" je žensko i feminističko udruženje koje radi na promjenama javnih politika, te educiranju i osnaživanju žena u bosanskohercegovačkom društvu kako bi kreirali ambijent potpune slobode i poštivanja ženskih prava. Osnovano je u martu 2024. godine zajedničkom idejom vodiljom i spremnošću članica udruženja da ponude nešto više i bolje za bh. žene. Udruženje broji stalnih 9 članica. Poseban fokus stavlja na osnaživanje žena u svim sferama, osobito na žene u ekonomskom, društvenom i političkom životu. Generalni cilj projekta je razvijanje većeg stepena povjerenja u transparentan i odgovoran rad udruženja/organizacija žena. Projektni ciljevi su: 1. Mapiranje stavova građanstva o stepenu transparentnog i odgovornog rada udruženja žena u Bosni i Hercegovini; 2. Približavanje rada udruženja/organizacija žena građanstvu, te osiguranje pozitivnog stava prema udruženjima/organizacijama žena.

2. Lokalna fondacija Zenica – „Snaga zajednice-Lokalna fondacija Zenica“

Lokalna fondacija Zenica je fondacija registrovana pri Ministarstvu pravde Bosne i Hercegovine 12.04.2024. godine. Od 2021. godine djelovala je kao Neformalna grupa Lokalna fondacija Zenica. Lokalna fondacija Zenica kroz filantropsko djelovanje želi da zajednicu vrate ljudima koji u njoj žive kako bi je učinili boljim mjestom za život. Dio su programa „Fondacija našeg kraja – Zajednica se pita!“ kojeg podržava Trag fondacija, svoje djelovanje započeli su 2021. godine. Ovim projektom žele izraditi Pravilnik o finansijskom poslovanju, Pravilnik o dodjeli grantova kao i Kriterije za dodjelu grantova, kao i izraditi video materijal u kome će prikazati svoj dosadašnji rad.

3. Društvo za medicinski i biološki inženjering u BiH (DMBIUBIH) - Optimizacija operativne efikasnosti i povećanje transparentnosti i odgovornosti u udruženju za inkluziju osoba s invaliditetom u STEM i biomedicinske discipline

Društvo za medicinski i biološki inženjering u Bosni i Hercegovini je nevladina, neprofitabilna organizacija, osnovana u martu 2014. godine. Udruženje je stručna zajednica zainteresiranih strana u oblasti medicinskog i biološkog inženjeringa i platforma za razmjenu informacija, koja radi za dobrobit zdravstvenih usluga u Bosni i Hercegovini. Članovi društva su univerzitetski profesori, ljekari, inženjeri i tehničari iz područja medicine i inženjeringa te studenti, mladi i profesionalci zainteresirani za ovo područje. Udruženje je uspostavilo veze s evropskim i međunarodnim krovnim organizacijama kao što su Međunarodna federacija za medicinsko i biološko inženjerstvo (IFMBE) od 2015. godine, Europska alijansa za medicinsko i biološko inženjerstvo i nauku (EAMBES) od 2017. godine, i American College of Clinical Engineering (ACCE) od 2020. godine. DMBIUBIH trenutno broji 63 aktivna člana i više od 1000 lica u svojoj mreži kontakata.



Udruženje DMBIUBIH prepoznaje izazove uključivanja osoba s invaliditetom u rad, te se obavezuje jačati svoje kapacitete i razumijevanje kako bi doprinijeli inkluziji u STEM discipline i biomedicinske nauke. Projekt se oslanja na angažman svojih članova i aktivista, te cilja na obuku i razvoj njihovih kapaciteta. Specifični ciljevi uključuju analizu potreba osoba s invaliditetom u STEM disciplinama, formulisanje akcionog plana za inkluziju, obuku članova Udruženja te medijsku kampanju za promociju inkluzije. Dugoročni cilj je promoviranje politika ravnopravnosti i mijenjanje kulturnih stavova i institucionalne prakse kako bi se stvorilo inkluzivnije okruženje za osobe s invaliditetom.

4. Udruženje za edukaciju i razvoj „Dignitet“ – Etikom do odgovornog i transparentnog poslovanja

Dignitet je hercegovačka organizacija civilnog društva osnovana 2020. godine s ciljem odgovora na izazove društvene stagnacije i degradacije te promocijom novih vrijednosti unutar civilnog društva. Njegujući primjerom i vrijednostima, žele biti uzor drugima. Fokusrani su na rehabilitaciju individualnog i društvenog dostojanstva te ostvarivanje ciljeva kroz različite programe, podržavajući izgradnju kapaciteta građanstva, psihosocijalnu i emancipacijsku podršku, javno zagovaranje za sistemske promjene te unapređenje kvalitete javnih usluga. Udruženje je potpisalo Etički kodeks za OCD u BiH te ima viziju života dostojnog čovjeka kroz principijelni rad i jačanje socijalne pravde i građanskih kapaciteta. Njihova misija je biti prepoznata regionalna organizacija koja podržava razvoj dostojanstvenog modela življenja putem mjerljivih rezultata. Projekat "Etikom do odgovornog i transparentnog poslovanja" ima za cilj doprinijeti jačanju transparentnosti i odgovornosti nevladinih organizacija u Bosni i Hercegovini kroz unaprijeđenje transparentnosti i odgovornosti rada samog Udruženja Dignitet. Cilj je ojačati kapacitete organizacija za odgovorno upravljanje resursima i povećati povjerenje javnosti u njihov rad. Vizija Udruženja jeste da postane primjer organizacija za transparentno i odgovorno poslovanje. Kroz ovaj projekt i postignute ciljeve Udruženje će biti promovirano kroz primjer dobre prakse u oblasti transparentnog i odgovornog poslovanja u civilnom sektoru, a što doprinosi unaprijeđenju saradnja sa korisnicima, partnerima, donatorima i kao i kreiraju većeg povjerenja javnosti.

5. Udruženje za edukaciju, profesionalno osposobljavanje i socijalno osnaživanje osoba sa invaliditetom Tuzlanskog kantona „RE-SET“ - „Transparentno poslovanje je izvor povjerenja“

Udruženje za edukaciju, profesionalno osposobljavanje i socijalno osnaživanje osoba sa invaliditetom TK "RE-SET" osnovano je u augustu 2020. godine i aktivno djeluje od juna 2021. godine s ciljem pružanja podrške osobama sa invaliditetom i radom na stvaranju društva s jednakim šansama i prilikama za sve. Udruženje je osnivač kompanije "RESET INŽINJERING" d.o.o. Tuzla, u kojoj trenutno zapošljava pet osoba sa invaliditetom, a planira zapošljavanje još najmanje tri osobe do kraja tekuće godine. Realizirali su tri važna projekta iz ekonomske neovisnosti za osobe sa invaliditetom, koje su finansirane od strane Grada Tuzla, Fondacije tuzlanske zajednice i JP BH Pošta. Također, pružaju podršku svojim korisnicima kroz programe finansijske podrške iz vlastitih sredstava, uključujući finansiranje stručnog usavršavanja i edukacije, troškove vanrednog osnovnog obrazovanja, te izdavanje i promociju autobiografske knjige.

Projekt "Transparentno poslovanje je izvor povjerenja" usmjeren je na unapređenje transparentnog, odgovornog i etičkog poslovanja među mladim osobama s invaliditetom u Bosni i Hercegovini (BiH). Udruženje za edukaciju, profesionalno osposobljavanje i socijalno osnaživanje osoba s invaliditetom TK "RE-SET", u suradnji s Edukacijsko-rehabilitacijskim fakultetom Univerziteta u Tuzli, provodit će ovaj projekt kako



bi omogućio jednak pristup informacijama i znanju, što će doprinijeti njihovom osnaživanju i boljoj integraciji u društvo.

Edukacije će se fokusirati na teme transparentnog, odgovornog i etičkog poslovanja i bit će namijenjene mladim osobama s invaliditetom. Radionice će voditi stručnjaci iz relevantnih područja, a svaka tema bit će pokrivena kroz više sesija kako bi se omogućilo dublje učenje i razumijevanje. Cilj je osposobiti sudionike za odgovorno i etičko poslovanje kako bi im se poboljšale šanse za zapošljavanje i socijalnu inkluziju. Osim edukativnih aktivnosti, projekt će se usredotočiti na povećanje transparentnosti rada Udruženja "RE-SET". To će se postići redovnim izvještavanjem i informiranjem javnosti o aktivnostima i postignućima projekta putem web stranica, društvenih mreža i informativnih biltena. Cilj je ojačati povjerenje javnosti i donatora u rad organizacije i civilnog sektora općenito. Ključne aktivnosti projekta uključuju organizaciju edukacija o transparentnom, odgovornom i etičkom poslovanju, prilagođenih mladim osobama s invaliditetom, te povećanje transparentnosti i učinkovitog predstavljanja rada putem web stranica, društvenih mreža i informativnih biltena.

6. 1. Fondacija LAILA, nosilac

2. UG Incijativa za integrisani razvoj „IDI” Brčko distrikt BiH, partner - Transparentnost i odgovornost u filantropiji Brčko distrikta BiH

Fondacija Laila osnovana je i registrovana u junu 2015g, od strane porodice Mešalić, sa osnivačem Edževitom Mešalić na čelu. Zalaže sa da sva djeca sa "dawn" sindromom i drugim uspostavljenim dijagnozama imaju istu vrstu pomoći u BiH. Partner na projektu Udruženje "IDI" -Incijativa za integrisani razvoj, Brčko Distrikt u BiH, je osnovano 22.05.2019.g. sa ciljem doprinosa povećanju stepena investicija i društva kroz upravljanje međunarodnim projektima, izgradnje građanskog društva, omladinskog rada, omladinske politike, formalnog i neformalnog obrazovanja, informiranosti, zdravlja, zdravih stilova života, ljudske bezbjednosti, borbe protiv korupcije, promocije sporta i sporta za sve, aktivizma, volonterizma, inkluzije marginalizovanih grupa, ravnopravnosti spolova, međunarodne saradnje, razvoja preduzetništva, zapošljavanja mladih, mobilnosti, razvoja nauke i istraživanja, očuvanja kulturnog nasljeđa, održivog razvoja i zaštite životne sredine.

Projekt ima za cilj osnažiti vlastite kapacitete aplikantata, ali i podržati organizacije civilnog društva (OCD) u Brčko distriktu BiH kako bi poboljšale svoje prakse poslovanja prema etičnijem, transparentnijem i odgovornijem pristupu. Ključna komponenta ovog projekta je osnaživanje internih kapaciteta, s obzirom da je Fondacija LAILA prošle godine obnovila poziv za volontere, aktiviste i suradnike te ih želi proći važnu obuku o transparentnom i vidljivom djelovanju u zajednici. Pored Fondacije LAILA, UG IDI također ima iskustva u radu i djelovanju, ali nema izgrađene kapacitete u radu na vidljivosti organizacije i implementaciji projekata. Pet drugih OCD-a također će se uključiti kako bi informacije o svom radu učinili dostupnima široj javnosti, što će povećati vidljivost i razumijevanje aktivnosti OCD-a te jačati povjerenje i suradnju među različitim dionicima.

Projekt uključuje promociju primjera dobre prakse u transparentnosti i odgovornosti kako bi se stvorili uzori za ostale organizacije i potaknula njihova primjena. To će se postići kroz edukativne radionice i medijsku kampanju na kojima će predstavnici OCD-a imati priliku učiti od stručnjaka i dijeliti iskustva. Također, planiran je razvoj alata i resursa koji će organizacijama pomoći u implementaciji politika i procedura koje promiču etiku i transparentnost. Projekt će uključivati aktivnosti usmjerene na povećanje interakcije i suradnje između OCD-



a i lokalnih vlasti, poslovnog sektora, medija i akademske zajednice kako bi se stvorila snažnija mreža podrške i razmjene znanja. Kroz ove interakcije, OCD će imati priliku predstaviti svoje projekte i inicijative širem krugu zainteresiranih strana, što će povećati njihovu vidljivost i utjecaj.

7. Udruga za promoviranje društvene solidarnosti „Srce za bližnje - Solidarnošću sa starijim ljudima do zdrave zajednice

Udruga „Srce za bližnje“ je nevladina, nestranačka i neprofitna organizacija osnovana 12. januara 2021. godine. Djeluje na području cijele Bosne i Hercegovine s ciljem poboljšanja kvalitete života i zdravlja osoba u riziku od siromaštva i socijalne isključenosti. Njihova misija uključuje razvoj mreža solidarnosti između starijih osoba i volontera, te poticanje međugeneracijske solidarnosti i građanske participacije. Vizija Udruge je stvaranje društva koje cijeni i podržava starije osobe, omogućujući im da aktivno sudjeluju u zajednici. Svoju misiju ostvaruju kroz nekoliko ključnih aktivnosti koje obuhvaćaju volonterski rad, osnaživanje starijih osoba za društveni aktivizam, te formiranje mreža starijih osoba za unapređenje društvenog života. Udruga se zalaže za transparentnost i odgovornost u svom poslovanju. Njihovo djelovanje je ocijenjeno prema standardima Izjave o priključenju inicijativi za jačanje transparentnosti i odgovornosti u BiH, no nedostatak revizorskih izvještaja sprječava ih da postignu najviši nivo priznanja (Platinum zvijezda). Udruga je vođena vrijednostima humanosti, etičnosti i filantropije. Njihov cilj je povećati povjerenje javnosti u njihov rad i podići reputaciju cijelog civilnog sektora u BiH. Kroz uspostavljanje transparentnih mehanizama, žele posebno privući i aktivirati starije osobe da postanu snažan pokretač razvoja solidarnog i odgovornog civilnog društva.

8. Lokalna Fondacija Bijeljina – Jačanje transparentnosti i odgovornosti

Grupa koja se okupila 2021. godine kao neformalna grupa Lokalne fondacije u sklopu programa Trag fondacije za osnaživanje i osnivanje Lokalnih fondacija u BiH, sastojala se uglavnom od prijatelja i poznanika u dobi od 25 do 40 godina, većinom porodičnih ljudi s područja Bijeljine. Njihova ambicija bila je osnažiti filantropiju u Bijeljini i postaviti Lokalnu fondaciju kao temelj aktivnosti darivanja i aktivizma na tom području. Realizirali su više javnih događaja i aktivnosti s ciljem promocije filantropije i prikupljanja sredstava, te su ta sredstva dijelili putem transparentnih javnih poziva za podršku aktivizmu u zajednici, podržavajući male projekte neformalnih grupa i udruženja građana. Od početka 2024. godine, registrirali su se kao fondacija pred Osnovnim sudom u Bijeljini i nastavljaju s radom uz suradnju s Trag fondacijom i drugim partnerima kako bi promovirali filantropiju, poticali aktivizam građana i unapređivali uvjete života svih građana.

9. UDRUŽENJE GRAĐANA “RUSAG” Prijedor - “Crno na bijelo”

Udruženje "Rusag", osnovano 2018. godine, broji 20 aktivnih članova i djeluje širom Bosne i Hercegovine. Organizacija je uspješno realizovala brojne projekte s ukupnim budžetom preko 100.000 KM, uz podršku renomiranih donatora kao što su Međunarodna organizacija za migracije, Agencija lokalne demokratije, Fondacija Mozaik i druge. Kroz aktivnosti poput sajмова, dječijih viteških dana i humanitarnih projekata, Udruženje promovira turizam i kulturno naslijeđe srednjovjekovne Bosne i Hercegovine, fokusirajući se na period vladavine kralja Tvrtka I Kotromanića. Udruženje "Rusag" aktivno je u Prijedoru i mnogim drugim gradovima Bosne i Hercegovine, te u Srbiji, Hrvatskoj i Sloveniji. Uspostavili su plodonosne saradnje s gradskim i općinskim institucijama, turističkim organizacijama i muzejima. Njihov rad je prepoznat i po



redovnom učešću na domaćim i međunarodnim srednjovjekovnim festivalima, a Dječiji viteški dani su postali prepoznatljiv regionalni festival. Članovi udruženja kontinuirano se usavršavaju i otvoreni su za sticanje novih vještina.

Projekat Udruženja "Rusag" ima za cilj unapređenje transparentnosti rada udruženja kroz edukaciju i modernizaciju svojih alata za prezentaciju. Projekat traje pet mjeseci.

10. Udruženje građana slovenačkog porijekla Tuzla - Transparentno je održivo

Udruženje građana slovenačkog porijekla Tuzla, osnovano 1993. godine, već 30 godina aktivno djeluje u Tuzli i širom Bosne i Hercegovine. Osnovano radi pružanja humanitarne pomoći tokom rata, Udruženje je postalo važan kulturni akter, promovirajući slovenačku kulturu i jačajući veze između Slovenije i BiH. Danas broji oko 300 članova iz Tuzle i okolnih općina. Udruženje kontinuirano doprinosi multikulturalnoj slici Tuzle, istovremeno osiguravajući transparentno poslovanje zbog podrške od strane Republike Slovenije. Aktivnosti su usklađene s potrebama članova i šire zajednice, a organizacija teži još većoj transparentnosti, posebno kroz digitalne kanale. Zbog gašenja internet stranice 2022. godine, Udruženje trenutno koristi društvene mreže za informisanje javnosti, što nije dovoljno za sve korisnike. Cilj projekta je ponovno uspostavljanje internet stranice i obuka mladih članova za njeno održavanje, čime bi se poboljšala transparentnost i održivost udruženja. Fokus je na uključivanju mlađih članova u rad Udruženja kroz obuku za grafički i web dizajn. Za realizaciju projekta, osim obnove internet stranice, potrebna je nabavka novog računara radi uredne digitalne arhive materijala udruženja, koji su trenutno pohranjeni na cd-ovima i dvd-ovima, s čime se već suočavaju s gubitkom dokumentacije. Internet stranica bi značajno doprinijela većoj transparentnosti rada udruženja, omogućavajući objavljivanje više informacija i dokumenata u usporedbi s društvenim mrežama.